

BOSNA I HERCEGOVINA  
Federacija Bosne i Hercegovine  
Tuzlanski kanton  
OPĆINA GRAČANICA  
OPĆINSKO VIJEĆE

Broj predmeta: 01-05-00939-2014  
Broj akta: 01EH-001  
Gračanica, 31. 03. 2014. godine

Z A P I S N I K  
SA VANREDNE SJEDNICE OPĆINSKOG VIJEĆA  
GRAČANICA

Održane dana 18. 02. 2014. godine u sali za sjednice nove zgrade Općine Gračanica, sa početkom u 10.00 sati.

Sjednici je prisustvovalo 29 članova Općinskog vijeća Gračanica. Odsutan je bio Krajinović Nihad.

Sjednicu je zakazao i istom predsjedavao Edin Ibrišević, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća Gračanica sjednici su prisustvovali i: Općinski načelnik Nusret Helić, Azra Mustajbašić, savjetnik načelnika za odnose sa javnošću, općinski pravobranilac, šefovi službi za upravu, predstavnik mladih i fejsbuk mreže Gračanica, predstavnik udruženja "Forum građana", predstavnici radnika firme "Grafopak", "Iplas", "Grafoplas", predstavnik Udruženja poslodavaca općine Gračanica, te predstavnici sredstava informisanja.

Predsjedavajući Vijeća je otvorio sjednicu i predložio dnevni reda sa jednom tačkom koja glasi:

**1. INFORMACIJA U VEZI SA PROTESTIMA RADNIKA I GRAĐANA  
I PODUZETIM MJERAMA I AKTIVNOSTIMA LOKALNE VLASTI  
U CILJU BRŽEG RJEŠAVANJA POKRENUTIH PITANJA I PROBLEMA**

S obzirom da je vanredna sjednica vijećnici se nisu izjašnjavali o predloženom dnevnom redu.

Općinski načelnik Nusret Helić je pročitao Informaciju koja glasi:

**"Uvod**

Opravdani protesti građana koji su započeli širom Federacije BiH, u kojima se ukazuje na teško stanje u društvu, dešavaju se i na našoj općini.

Već u petak, 07.02.2014.g. od 12 sati, ispred zgrade Općine okupilo se nekoliko stotina građana koji su došli da iskažu svoje nezadovoljstvo i pruže podršku protestima radnika i građana u Tuzli, a i šire.

Nezadovoljnim građanima obratio se Općinski načelnik, dao otvorenu podršku zahtjevima i zatražio da sa predstavnicima, prije svega nezadovoljnih radnika Olimpa, Fortune i Grafopaka, nastavi razgovore u kabinetu. U međuvremenu građani su otišli sa prostora ispred Općine i iskazivali proteste u drugom dijelu grada.

Radnici navedenih firmi i građani, njih oko 30, su u dvosatnom razgovoru sa Načelnikom iznijeli probleme koji su se prije svega odnosili na problem neuvezanog radnog staža, zdravstvenog osiguranja, potrebe revizije privatizacije, sporog rada pravosudnih organa i procesuiranja pljačkaša radničke imovine, ukudanje „bijelog hljeba“ idr.

Zajednički zaključak sa ovog sastanka je da su protesti potpuno opravdani i da iznesene zahtjeve treba uputiti prema višim organima i upućen je poziv građanima Gračanice da se ne dozvoli da se opravdani protesti pretvore u nasilje i devastiranje imovine.

Negdje poslije dva sata ponovo se ispred Općine okupila nešto manja grupa građana, koja je tražila da im se obrati Općinski načelnik.

Načelnik se ponovo obratio građanima, razgovarao sa njima, sad već i o pojedinačnim problemima i načinu rješavanja. Nakon pola sata razgovora građani su se razišli.

Svakom ozbiljnom političaru ovi protesti i informacije sa društvenih mreža trebale bi biti signal da se shvati ozbiljnost problema i započne rješavanje onog što je iznešeno i na što su građani ukazivali.

Mi smo to u lokalnoj vlasti shvatili i odmah zakazali zajednički sastanak Načelnika i kolegija Općinskog vijeća (ponedjeljak, 10.02.2014.g.). Prije kolegija, Načelnik je ponovo u kabinetu razgovarao sa predstavnicima sindikata, radnika i direktorom Grafopaka o načinu pokretanja rješavanja njihovih problema i ostvarivanja prava.

Na kolegiju Općinskog vijeća koji je održan odmah poslije prethodnog sastanka razgovaralo se o mogućim mjerama i zadacima lokalne vlasti u rješavanju iznešenih zahtjeva i prijedloga sa protesta.

Dok je trajao sastanak ponovo se skupila veća grupa građana i radnika ispred zgrade Općine, te je dogovoreno da se prekine sjednica kolegija, izađe pred građane i da im se ponovo obrati Općinski načelnik. Nakon obraćanja Načelnika zatraženo je da se održi zajednički sastanak predstavnika okupljenih građana, Načelnika i kolegija. Sastanku su prisustvovali predstavnici radnika Fortune, Iplasa, Grafopaka, građana i mediji.

Poslije iznesenih zahtjeva i prijedloga koji su se odnosili na probleme uvezivanja staža, zdravstvenog osiguranja, bržeg rješavanja sudskih postupaka, postupka revizije privatizacije, ukidanje „bijelog hljeba“, redovnije isplate stipendija, provjere zakonitosti zapošljavanja i dr. dogovoreno je i zaključeno:

1. Potpuno su opravdani protesti građana širom Federacije BiH, koji su rezultat teške ekonomske situacije, siromaštva i nepravde, na koje su i ranije ukazivali građani i radnici i ignorantskog odnosa vlasti naspram problema građana
2. Da Općinski načelnik odmah pristupi poduzimanju mjera iz svoje nadležnosti
3. Da se u roku od deset dana održi sjednica Općinskog vijeća na ovu temu

### **Poduzete mjere i aktivnosti**

1. Odmah je (11.02.2014.g.) održana vanredna proširena sjednica kolegija Općinskog načelnika, na kojoj su osim šefova službi, pravobranioca, prisustvovali i šefovi odsjeka, na kome je

Načelnik prisutne informisao o protestima, zahtjevima, problemima i o tome šta treba činiti i kako da se organizuje lokalna vlast da se poslovi i zahtjevi iz nadležnosti Općine brže i kvalitetnije rješavaju.

Poslije višesatne rasprave u kojoj su učestvovali svi prisutni, donešeni su zaključci i smjernice za rad, i to:

- a) Opravdan je revolt građana i nezadovoljstvo sa stanjem u zemlji i sporim rješavanjem glavnih životnih problema, kao što su nezaposlenost, socijalna zaštita i briga, zdravstveno i penziono osiguranje i dr. Iako protesti nisu izazvani lokalnim problemima, oni su dovoljan signal da se i u lokalnoj vlasti svi zajedno i svako pojedinačno moramo preispitati jesmo li dovoljno učinili za naše građane i još bolje se organizovati i uspješnije raditi svoj posao. Može i mora još bolje i odgovornije.
  - b) Stari predmeti se odmah moraju uzeti u rad i prioritarno završiti, a za neopravdano rješavanje predmeta van rokova vršiti sankcionisanje umanjivanjem plaće i na drugi način.
  - c) U narednih mjesec dana će se analizirati sve odluke koje regulišu visinu taksa i naknada i pripremiti za Općinsko vijeće izmjene i dopune u smislu njihovog smanjenja i rasterećenja građana i privrednih subjekata.
  - d) Svi zahtjevi, inicijative i prijedlozi sa protesta i uopće moraju se rješavati u sklopu zakonskih rješenja i procedura. Zapošljavanja u Općini mimo propisane zakonske procedure nije bilo, a sve provjere vrši nadležna kantonalna i federalna inspekcija. Dio dokumentacije smo već dostavili inspekciji na provjeru.
2. Načelnik je donio odluku o ukidanju svih naknada uposlenicima za rad u komisijama i u toku radnog vremena (iako su i do sada bile minimalne).
  3. Ukida se mjesečna naknada za rad članovima Općinskog štaba civilne zaštite.
  4. Sredstva od ukinutih naknada po odlukama Općinskog načelnika, kao i dio neisplaćenih iz ranijih godina, usmjerit će se u socijalne pomoći najugroženijim kategorijama građana.
  5. Dat je nalog i isplaćene su posljednja stipendija iz prošle godine i prve dvije stipendije za ovu godinu. Takođe je dat i nalog za isplaćivanje – povrat više uplaćenih poreza na dohodak fizičkih lica. Najveća dugovanja su već isplaćena.
  6. Načelnik zahtijeva od upravnih i nadzornih odbora koji su postavljeni njegovim rješenjem, a Općinsko vijeće od onih koje je imenovalo, da odmah preispitaju visinu naknada odborima i drugih primanja u svojim ustanovama i preduzećima, o čemu će informisati Načelnika i Općinsko vijeće do kraja mjeseca. U cilju realizacije Načelnik će održati sastanak sa predsjednicima upravnih i nadzornih odbora i direktorima javnih preduzeća i ustanova.
  7. Načelnik i Općinsko vijeće traže od kolegija i Skupštine TK da se po odluci kolegija Skupštine od 12.02.2014.g. prilikom razmatranja zahtjeva radnika: Konjuh d.o.o. Živinice, Dita Tuzla, Resod Guming d.d. Tuzla, Polihem i drugi za ostvarivanje socijalnih prava, uzmu u obzir i radnici Grafopak Gračanica, Fortuna, Iplas i dr., posebno u obezbjeđivanju zdravstvenog osiguranja neosiguranih radnika i povrate sredstva za bolovanja.

8. Općinski načelnik je u srijedu, 12.02.2014.g., i petak, 14.02.2014.g., ponovo primio predstavnike sindikata i radnika Grafopaka, kojem je prisustvovala i predsjednica granskog sindikata FBiH, na kome je razgovarano o problemima radnika ove firme. Ako se većina radnika odluči za stečaj, Načelnik će obezbijediti 10.000 KM za taksu i jednokratne pomoći za najteže slučajeve.
9. Općinski načelnik i Općinsko vijeće će biti pokretači i inicijatori promjena svih propisa viših nivoa vlasti koji su smetnja bržem rješavanju problema građana, privrednih i drugih subjekata. Obavezuje se Služba za prostorno uređenje i druge službe da odmah pripreme prijedloge koji se odnose na Zakon o građenju, prostornom uređenju, poljoprivrednom zemljištu i prostornom planu.
10. Načelnik i Općinsko vijeće podržavaju prijedloge koji se odnose na hitno ukidanje „bijelog hljeba“ i drugih privilegija izabranih dužnosnika i donošenje propisa o ograničavanju plaća u javnom sektoru.
11. Naša općina će se kao i do sada, za razliku od drugih, ponašati racionalno u trošenju budžetskih sredstava, uključujući plaće i sve vrste naknada. Potvrda toga je da nismo plaće povećavali zadnjih deset godina, i one su gotovo najmanje na TK i šire, da smo i prije donošenja zakona smanjili dnevnice za službena putovanja sa 50 KM na 25 KM, odnosno 17 KM, smanjen je topli obrok, regres, otpremnine, ukinuta naknada za jubilarne nagrade i sl. I paušali vijećnicima su 2011. godine smanjeni za 150 KM i sada su gotovo najmanji na TK (300 KM). U zadnjih deset godina smo smanjili za 20% broj zaposlenih, tako da danas imamo najmanje zaposlenih u administraciji u odnosu na broj stanovnika.
12. Sindikalna organizacija državnih službenika i namještenika Općine je održala sastanak i podržala mirne proteste građana i opravdane zahtjeve, ali se protivi daljem smanjenju plaća radnicima iz ranije navedenih razloga, te traže da se poštuju zakonski okviri.
13. Na narednoj sjednici Općinskog vijeća pokrenuti inicijativu za promjenu Statuta Općine Gračanica s ciljem da se funkcija predsjedavajućeg Općinskog vijeća deprofesionalizuje.
14. Načelnik i Općinsko vijeće traže hitno postupanje i okončanje stečajnog postupka u Zemljoradničkoj zadruzi Lukavica, koji se vodi u Sudu Tuzla pod brojem L-01/04 još od 2001. godine. Ukoliko je rezultat sporog rješenja stečaja postojeći upravnik Muratović Hamdija, istog treba zamijeniti drugim.“

Himzo Avdić:

„Klub vijećnika BPS-a će podržati ovu informaciju. Zajedno smo radili na ovoj informaciji, ne samo načelnik nego i šefovi službi za upravu i Kolegij Općinskog vijeća. Normalno da ima još nekih stvari koje treba dopuniti, ali u narednom periodu dok se malo situacija stagnira i to ćemo razmatrati u svrhu boljeg života građana i rješavanja što više njihovih problema.“

Fadil Mešić:

„Informacija u vezi sa protestima radnika i građana o poduzetim mjerama i aktivnostima lokalne vlasti u cilju bržeg rješavanja pokrenutih pitanja i problema, naravno kao vijećnik na istu ću dati potpunu podršku Općinskom načelniku. Iščitavajući ove poduzete mjere zajedno sa Kolegijem Općinskog vijeća, načelnik se maksimalno stavio u službu građana rješavajući u ovom trenutku koliko može. Da ne čitam ovo što je već načelnik pročitao, znači mjere su poduzete. Ja bih samo dodao i sljedeće. Upravni odbor Bolnice i menadžment su postigli dogovor o smanjenju plaća direktoru i naknade članovima upravnih odbora, naravno uvažavajući tešku ekonomsku situaciju i prije zvaničnog stava Općinskog vijeća i upozorenja Općinskog načelnika, a Općinsko vijeće je osnivač JZU, to znamo. Bolnica, Upravni odbor i direktor su se dogovorili i smanjili platu direktoru 30%. To se može provjeriti. Kada analiziramo ove proteste u Gračanici, zahvaljujući mudrosti Općinskog načelnika koji je izašao pred građane i obratio se, naravno uvažavajući sve njihove zahtjeve, evo i sa ove govornice želim da kažem i izrazim svoje zadovoljstvo što nije došlo do ulaska demonstranata u zgradu, iako su bili spremni. Ovoga puta je načelnik potpuno pravilno uradio, obratio se građanima, zatim grupa koja je tu bila ušla je u kabinet predsjedavajućeg Općinskog vijeća, koji takođe imao mudrosti i svi mi. Tako da i u narednom periodu će se dešavati problemi radnika, što je naravno na nivou općina, a što je i na nivou viših organa, to će se i uputiti ka višim organima vlasti.“

Vehid Osmanović:

„Klub vijećnika SDP-a podržava mjere koje je načelnik zajedno sa Kolegijem u ovom kratkom vremenu do sada i uradio, a i dalje ćemo raditi na smanjenju javne potrošnje, u korist obespravljenih i socijalno ugroženih kategorija.“

Rahim Gadžić:

„Klub vijećnika SDA razmatrao je Informaciju o poduzetnim mjerama i podržavamo ovu informaciju iz tog razloga što vidimo konkretne korake koje je uradio Općinski načelnik zajedno sa Kolegijem Općinskog vijeća. Nadam se da ćemo i u narednom periodu sarađivati i raditi u interesu građana općine Gračanica. Mi, a i načelnik ćemo se staviti na raspolaganje građanima u rješavanju svih njihovih problema.“

Mujo Hasić:

„Ja bih naravno dao podršku ovoj informaciji i dodao još nešto što ćemo mi ovdje usvojiti u formi zaključaka i proslijediti onim institucijama koje su nadležne za to.

Pod jedan ubrzati stečajne postupke i ograničiti dužinu trajanja stečajnog postupka. Za to su nadležni sudovi, a imamo evo informaciju da je od 2001. godine stečajni postupak u toku za ZZ „Kooperativa“ Lukavica i stečajni upravnik sisa stečajnu masu koja bi za vrijeme rješavanja tog postupka mogla biti ravna nuli.

Pod dva, u što kraćem roku refundirati bolovanje preduzećima čiji su radnici bili na bolovanju. Time bi vjerovatno popravili to preduzeće za te iznose u finansijama.

Pod tri, povezati radni staž, a to je ono što je i načelnik govorio malo prije u svim firmama na području općine Gračanica a i šire. Tu spadaju „Fortuna“, „Olimp“, „Grafopek“, „Kokaproduct“, „Fering“, „Iplas“ i druge radnike čiji je radni staž nepovezan.

Pod četiri, da se pravnim licima otpišu obaveze po osnovu doprinosa za zdravstveno osiguranje jer u vrijeme kad im zdravstvenu knjižice nisu bile ovjerene, nisu bili u mogućnosti ni da

koriste zdravstvene usluge. Znači, bez obzira na zdravstvenu solidarnost radnici nisu koristili zdravstvene usluge i u tu svrhu treba im to otpisati.

Pod pet, da se pravnim licima do momenta privatizacije otpišu obaveze po osnovu penzijskog, mirovinskog zdravstvenog osiguranja. Znači do momenta privatizacije, gdje je kapital bio državni da se preduzećima otpišu te obaveze.

Pod šest, da primarna zdravstvena zaštita bude dostupna svim građanima BiH bez obzira na to da li se nalaze na Zavodu za zapošljavanje ili ne. Imamo slučaj da se radnici prijavljuju na Zavod samo iz tog razloga da bi ostvarili zdravstvenu zaštitu, a onda odu tamo negdje i rade na crno.

I pod sedam može da, institucije koje su nadležne za to maksimalno se angažuju na suzbijanju rada na crno jer su uz pravna lica suodgovorni i oni uposlenici koji pristaju da rade na crno.“

Safet Pjanić:

„Kao vijećnik želim da kažem par riječi vezano za situaciju koja se dogodila u proteklih deset dana. Obzirom da sam na jedan način i prozvan kroz radnike „Fortune“ ja ću morati da dam par pojašnjenja vezano za tu firmu i borbu koja se vodila u ovoj državi, odnosno na našem kantonu. Neko je davno rekao da se kokuzluk i gripa ne mogu shvatiti. Evo vidite da se to tako i pokazalo i obistinilo i ja vjerujem da ovo nije kraj, da je ovo početak protesta radnika i da će se taj kokuzluk u narednom periodu još i više pokazivati. Politiku koju je vodila Federacija, prije svega naš kanton, a ona je da kažem nekoinzitentna, retrogradna, bahata i dovela je tvornicu obuće do stajanja, fabriku koja je u datom momentu ostala bez posla. Daju posao drugima, i o tome smo izvještavali načelnika i gosp. premijera i te pare koje „Fortuna“ njima plaćala, istim su uvezivali staž, firmama u Tuzli i oko Tuzle, a firmu „Fortuna“ pokušavaju da sahrane. Mislim da ga treba proglasiti personom nepoželjnom bar na kantonu. Pola miliona i više je duga za porodiljska bolovanja, a to su pare koje sam ja dao u kešu i iste treba vratiti, a od toga do dan danas je nemam ništa, tako da mi je sada u potpunosti ugrožena likvidnost, a to je gore nego da se radi sa gubitkom. Tekuća likvidnost je mnogo opasnija nego gubitak i to je za fabriku, za firme rak rana. I ovaj puta apelujem na Općinsko vijeće i načelnika da se hitno iznađu mjere za rješenje ovakvog stanja u fabrici i firmi koja u dvadeset zadnjih godina uplaćuje zdravstveno osiguranje radnicima i uvezuje radni staž onda kad za to dođe vrijeme. Znači, nama niko ne uvezuje radni staž i da su mi dali moje pare ne bi bilo problema. Ja nisam kokuz. Duguju mi dva i po miliona za ostala bolovanja i to ću morati da tražim putem suda. Ja na ovaj način želim da izrazim nezadovoljstvo jer to od mene traže moji radnici, a kolega Hasić je predložio par stvari, a ja ću samo da dodam još dvije. U ovoj državi mjesta za štednju itekako ima. Prvo para ima, a može se i mnogo para uštediti, onda kad shvatite svi da se moraju smanjiti plate u javnim preduzećima, bar u Federaciji i javna potrošnja, jer nemoguće je da jedan radnik u Elektroprivredi koji hoda i očitava brojilo ima platu 1500,00 KM, a moj VKV ima 400,00 KM. To je nemoguće. Ko je to postavio banderu, struju itd. Takođe i u drugim firmama. Jedino rješenje u ovoj državi je i smanjenje plata u javnim preduzećima i ostalim i ostale javne potrošnje i drugog načina nema. Smanjiti paušal za 50 ili 100,00 KM nije ništa, to može biti samo primjer kako treba raditi. O tome ćemo govoriti na narednoj sjednici. I druga stvar, ustroj ovog ustava, nakaradnog znači, treba reforma ustava. Drugog načina rješenja krize u BiH nema i doći će ponovo do ovakvih protesta. Prvu stvar koju bih ja predložio ovdje kao vijećnik je da se za sva javna preduzeća, a to važi i za našu Općinu raspiše javni oglas za hranjenje radnika Općine, javnih preduzeća, putem tendera jer ima mnogo firmi na općini koje bi htjele da hrane za 4,00 KM, da vas ne bi bolio stomak od ćevapa i po tom osnovu bi se uštedilo, ja sam računao na godišnjem nivou preko 200.000,00 KM. A znam da imaju neki 12,00

KM topli obrok, a negdje je on i 16,00 KM. To je znači vrlo lako uraditi. Ima mjesta ima prostora evo ja ću hraniti po 4,00 KM i imat će i salatu i glavno jelo i hljeb i nećete znači imati nikakvih problema. Znači ima načina i neka se ne priča mimo ništa kad su u pitanju vijećnici i paušal, jer ima drugih rješenja koji se mogu uraditi i da se dođe do itakako većih ušteda. To je jedan moj prijedlog. Drugi moj prijedlog je da se uputi zahtjev Zavodu za zdravstveno osiguranje TK kad su u pitanju naprimjer osiguranje, markice. Da se te tkzv markice ili vinjete ukinu jer možda neko ima 50 radnika i to je 1.000,00 KM, a ja imam 3.000 vinjeta pa je to 60.000,00 KM. Nekad je bila 8,00 KM, pa 10,00 KM, a sad je 20,00 KM. Mislim da i tu ima prostora i da je to moj drugi prijedlog koji nadovezujem na prijedloge kolege Hasića. Na narednoj sjednici ću predložiti još mnogo drugih stvari kad su u pitanju uštede. I politika prije svega koja se vodila u Općini kao lokalnoj zajednici jer je nedopustivo da topli obrok bude veći od plate jednog radnika u „Fortuni“, „Olimpu“ itd. Ne može, jer mi radimo za EUR-e i ne možemo nadavati ostalim. Neće povući teret samo vijećnici, povući će teret i drugi. Teret krize mora se podijeliti na sve podjednako. Ja ovo upozoravam i bojim se da neće biti kasno jer će radnici „Fortune“ njih 1.300 izaći i tražiti svoje pravo na ulici i onda neće ostati sve uredu. Budite svjesni da se mora mnogo toga uložiti na pomoći socijalno ugroženim kategorijama, radnicima koji su obespravljeni, ne može radnik uvezati staž, a načelnik može raditi druge stvari koje su u interesu lokalne zajednice i ljudi koji žive u ovoj općini. Ja sam to ovako rekao, na to imam puno pravo, to od mene ljudi traže. Ja vodim firmu 20 godina i nisam nikad došao u goru situaciju. Je li to što nisam član SDP-a, ja ne znam, ali počinjem da sumnjam u sve. Sto sam puta bio u Tuzli i po noći i po danu, imao sam razgovore i konsultativne i svakakve i nisam uspio. Šta treba da uradim više da svojim radnicima obezbijedim makar 50,00 KM veću platu. Toliko i hvala.“

Nije bilo više učesnika u diskusiji, a Rahim Gadžić je u ime Kluba vijećnika SDA zatražio pauzu i predložio da se održi sastanak Kolegija Općinskog vijeća.

Data je pauza u trajanju od petnaest minuta.

Nastavku sjednice prisustvuje 29 članova Vijeća. I dalje je odsutan Krajinović Nihad.

Predsjedavajući Općinskog vijeća Edin Ibrišević iznio je sljedeće:

„Evo nakon pauze i održane sjednice Kolegija Općinskog vijeća Gračanica, konstatovano je da se izjasnimo o ovoj informaciji koju smo imali u vezi sa protestima građana i poduzetim mjerama, a da ostale diskusije koje smo imali na sjednici, kada su u pitanju viši nivoi vlasti, uzet ćemo u razmatranje na narednoj sjednici Kolegija Općinskog vijeća Gračanica, te zauteti određeni stav i proslijediti na one adrese za koje su nadležni viši nivoi vlasti.“

Informacija u vezi sa protestima radnika i građana i poduzetim mjerama i aktivnostima lokalne vlasti u cilju bržeg rješavanja pokrenutih pitanja i problema je usvojena jednoglasno sa 29 glasova „ZA“.

Nakon toga, Općinskom vijeću i prisutnima na vanrednoj sjednici Vijeća obratila se Zada Bešić ispred fejbuk grupe, protesti u Gračanici.

Zada Bešić:

“Ja sam jedna od predstavnica neformalne grupe građana što se tiče protesta ovdje u Gračanici, takođe predstavnik grupe na društvenoj mreži fejbuk i predstavnica mladih. Što se tiče zahtjeva koje smo uputili Općinskom načelniku, neki od njih su pročitani ovdje i usvojeni. Što se tiče

svih tih zahtjeva, ja bih da izrazim svoje negodovanje što se tiče nekih zahtjeva s tim da su površno pročitani. Znači nisu spomenute nikakve cifre. Što se tiče državnog nivoa upoznati smo da 90% budžeta se troši na javni sektor s tim da odmah naglasim da je većina zahtjeva koja je upućena, da se potrošnja javnog sektora smanji. Što se tiče nekih zahtjeva, da naglasim, ovaj zahtjev oko isplate stipendija, isplaćene su dvije stipendije, a u zahtjevima stoji tri. Dalje što se tiče protesta samih građana, ja vjerujem da ste vi zahvalni što građani nisu pokazali nikakav oblik vandalizma s tim da to i nije bio cilj da se to pokazuje. Vrlo dobro znate da su ljudi nezadovoljni što se tiče nezaposlenosti, socijalne zaštite, zdravstvenog i penzionog osiguranja. Isfrustrirani su što se godinama o tome ne priča i što se godinama o tome šuti. Vrlo dobro znate da na prethodnoj sjednici koju smo imali sa Općinskim načelnikom mi smo rekli da su tri zahtjeva poslana vezano za imena lica koja su uposlena u Općini ovdje s tim da je načelnik jasno naglasio da su oni došli putem konkursa. Građani nisu dobro formulirali svoj zahtjev i nije bio cilj da se iko otpusti, nego da se izloži sistematizacija radnih mjesta. Da se objasni ljudima, pošto je imenom bilo naglašeno, jedna radna pozicija, a to je viši referent za kopiranje i da li to uopće postoji. Zatim jedan zahtjev nije uopće spomenut, a koji sam ja vrlo jasno iznijela, a to je dvorana ovdje na Bazenu za srednjoškolce. Što se tiče proteklih godina vi vrlo dobro znate da je registrovano najmanje deset saobraćajnih nezgoda ovdje kod školske sale gdje su djeca povrijeđena prilikom odlaska na čas tjelesnog odgoja. Upućeni ste da ta sala broji jedan čas 100 učenika na terenu od 18 metara. Samo bih napomenula da taj zahtjev niste uopće registrovali niti pomenuli, a ni uvažili. Što se tiče tog zahtjeva, mi jasno znamo da 60.000,00 ide za sajam koji se organizuje u Gračanici i naš jedan od prijedloga je da bi se taj isti sajam mogao prenijeti ovdje u dvoranu ako bismo je izgradili. Samim tim bi se tih 60.000,00 KM usmjerilo u nešto drugo i manje bi se potrošilo na samo organizovanje tog istog sajma. Isto tako 90.000,00 KM ide na političke stranke, a suvišno je jer se non-stop otvaraju neke nove stranke, sa jednim te istim predizbornim programima i kampanjama i da se uzimaju bespotrebno sredstva iz budžeta. Vrlo dobro znate da stranke, kada je predizborna kampanja izlaze sa veoma sličnim programima s tim da samo preformulišu prijedloge rada u svom nastojećem mandatu ukoliko budu izabrane. Ja bih samo da napomenem da sve treba da bude transparentno što se tiče potrošnje javnog budžeta, a ne samo na Općinu, jer stvarno uvjereni ste da se u deset dana napravilo nešto što se moglo napraviti realno prije godina i godina. Znači radite bukvalno pod pritiskom. Ako je do toga, građani su se sada povukli s tim da ste jasno iznijeli mjere koje ste na zahtjeve poduzeli i da isto tako se mogu u tri puta većem broju sastati i izraziti negodovanje što ste im premazali oči govoreći uopćeno. Traži se znači u ciframa i dokumentima prikaz sve te potrošnje i svih tih smanjenja o kojima pričate. Evo predlažem da iskoristite svoju stranicu Općine Gračanica i da skenirate sve te dokumente o kojima ste ovdje pričali i da narodu pokažete šta ste ustvari uradili jer samom pričom nećete doći na osudu samo vi, doći ću i ja koja sam ih predstavljala i može samo da se pogorša situacija. Što se tiče zdravstva ovdje je par vas iznijelo neke zahtjeve i neka negodovanja. Što se tiče samih građana u općini Gračanica, evo Općina je poduzela neke mjere, ali ne treba da se prave protesti ispred svake ustanove da bi neko radio. Ne treba da se mi skupimo ispred Suda, ispred Doma zdravlja, ispred Socijalnog i da ovo isto pravimo i da o ovom istom pričamo za svakog posebno. Treba da se potrudite da ovo ide na nivo čitave općine. A isto tako zahtjeve da uputite višim nivoima vlasti koji nažalost nisu u vašim nadležnostima. Isto tako bih da se zahvalim na vašoj korektnosti i na brzini poduzimanja mjere kako ne bi došlo do uništavanja imovine, što nije ni u cilju ovih istih građana koji su izašli na ulice, a ni vas da vam neko ošteti vaše radno mjesto na koje svaki dan i vi dolazite. S tim bih ja da zaključim ovaj govor i da vas zamolim da uvažite tu istu dvoranu i da prikazete ovim našim građanima šta ste ustvari



uradili, ali ne pričom, ne uopćeno mi ćemo smanjiti, mi smo smanjili, već da tačno dokumentima prikazete. Da li ćete to vi ovdje preko Općinskog vijeće svaki put kada se sastanete, ili ćete to uraditi preko stranice, to je do vas, ali vjerujte da je puno efikasnije da iskoristite tu vašu stranicu, kako ne bi došlo do ponovnog sakupljanja građana. Isto bih da napomenem ovo što ste napravili u deset dana može da se koristi i da apelujete na sve ostale institucije koje sam već navela. Ne treba da svako sjedi skrštenih ruku kako bi došao narod pred njihova vrata i molio da se nešto uradi. Treba da uzmete u obzir i to da je puno više njih registrovano u narodnoj kuhinji i ako vam je u cilju da imate što više gladnih, a vama što veće plate, onda vjerujte realno će izaći svih 50.000 građana na ulice.“

Vijeću se obratio i Mehmed Imširović, projekt menadžer Udruženja građana „Forum“ koje je registrovano i koje se uključilo u ovu aktivnost da bi profilisalo opravdane zahtjeve građana:

„Ovo što smo danas čuli može se ocijeniti kao jednim dijelom i udovoljavanje zahtjevima koje ste čuli na skupovima ovdje u Gračanici. Međutim, slažem se sa gospođicom Bešić da je to dosta uopšteno. Ovdje smo mi očekivali da će se izglasati smanjenje paušala, ali ste to vješto izbjegli i putem naših medija ćemo vas kritikovati. Nije tačno da je paušal 300, tačno je da je 400,00 KM. Zahtjev je bio 200,00 KM i kad biste to skinuli dobili bi 75.000,00 KM jer je za paušal predviđeno 150.000,00KM. I gospođica je pomenula 90.000,00 KM za političke stranke i taj ste zahtjev čuli. I drugi zahtjevi kad bi se uvažili imali bi dovoljno novaca da ovo sa salom riješimo. I to je jedan zaista krupan zahtjev i od koristi svih građana, ali eto ignorišete i to. Ja sam jedan od onih koji je putem medija dosta kritikovao lokalnu vlast. Neko je to shvatio da je to lični moj problem, a ja sam neki dan ovdje na skupu rekao da uopšte nemam ja razloga. Nisam socijalno ugrožen, nemam razloga, niti imam razloga da imam neku ličnu netrpeljivost. Moje je opredjeljenje da se borim za obespravljene i to ću raditi dok sam živ. I to što tražim isključivo je radi toga. Da vam kažem, slažem se sa gospođicom, nemojte se igrati sa javnošću. Nemojte im se rugati. Ovo što ste uopšteno sve rekli ima dosta tu stvari što je načelnik predložio i to sve ove koje su konkretne i to je za pozdraviti. A ono drugo, morate to ozbiljno shvatiti. Ima tu puno novca. Govorio je o tome i direktor Pjanić. Ima tu puno novca nemojmo izbjegavati. Puno je 400,00 KM za sat ili dva sjediti ovdje. O tome Gračanica čitava bruji, zna se. Nemojmo se mjeriti sa Doboju Istokom koliko oni imaju, jer oni nemaju 9.500 nezaposlenih. Zbog ovakvih stavova ovako će i dalje biti. Iskreno, imao sam napad na sjedište udruženja i gračaničkih novina. Policija je morala intervenisati. Mi tražimo od policije zaštitu. Znamo mi ko je nalogodavac, ali nećemo odustati, a vi se sada igrajte. Putem našeg medija direktno po imence svakog od vas vijećnika reći ćemo gdje radi, koliko prima i koliko sad ovdje uzima. Nema više uopšteno, ja ću, mi ćemo itd. Sa tim se suočite. Hvala.“

Predsjedavajući Vijeća je konstatovao da je završena vanredna sjednica Općinskog vijeća Gračanica.

Sjednica je završena u 11.20 sati.

Zapisnik vodila: Mevlida Naimkadić

Tonski snimak sjednice uredno je arhiviran.

Mevlida Naimkadić

PREDSJEDAVAJUĆI  
OPĆINSKOG VIJEĆA

mr.sci. Edin Ibrišević